

# PM rasmi Universiti

26 AUG 2002

Oleh Mohd Feroz  
Abu Bakar

PERASMIAN Universiti Terbuka Malaysia (Unitem) hari ini, yang akan disempurnakan oleh Perdana Menteri. Datuk Seri Dr Mahathir Mohamad, memberi nafas baru bidang pendidikan tinggi negara, khususnya dalam kaedah pengajaran dan pembelajaran.

Unitem atau 'Open University' melaksanakan konsep pendidikan jarak jauh (PJJ) dan menjadi institusi pendidikan tinggi pertama di negara ini melaksanakan kaedah itu sepenuhnya. Ia adalah anak syarikat Meteor yang kini beroperasi di Jalan Tun Ismail, Kuala Lumpur, yang dulunya adalah Kompleks Jabatan Perkhidmatan Awam (JPA), yang kini berpindah sepenuhnya ke Putrajaya.

Ia adalah universiti swasta

ketujuh ditubuhkan, selepas Universiti Multimedia (UMM), Universiti Tenaga Nasional (Uniten), Universiti Teknologi Petronas (UTP), Universiti Tun Abdul Razak (Unitar), Universiti Perubatan Antarabangsa (IMU) dan Universiti Industri Selangor (Unisel).

Universiti ini menggunakan kaedah pengajaran dan pembelajaran secara gabungan pelbagai kaedah, iaitu secara bersema-muka, nota bercetak dan online.

Pengambilan pertama Unitem dibuat pada Ogos tahun lalu dan kini menawarkan dua program diploma dan enam program ijazah pertama. Program itu ialah Diploma Pengurusan, Diploma Teknologi Maklumat (IT), Sarjana Muda Pengurusan, Sarjana Muda Pentadbiran Perniagaan, Sarjana Muda Komunikasi Multimedia.

Sarjana Muda IT, Sarjana Muda IT dan Pengurusan, serta Sarjana Muda Pendidikan (TESL, Sains, Matematik, Kejuruteraan Awam, Mekanikal dan Elektrik).

Unitem mempunyai lima fakulti, iaitu Pusat Pengajian Perniagaan dan Pengurusan, Pusat Pengajian IT dan Komunikasi Multimedia, Pusat Pengajian Kejuruteraan dan Teknikal, Pusat Pengajian Asas dan Sains dan Pusat Pengajian Pendidikan, Sastera dan Sains Sosial.

Sebahagian daripada bahan kuliah itu disediakan dalam bentuk modul bercetak atau nota yang juga mengandungi kaedah mengulang kaji dan soalan latihan serta ujian.

Sebahagian lagi bahan kuliahnya dibuat dalam bentuk cakera padat dan online, iaitu menerusi Internet untuk memudahkan pelajar yang jauh

dari pusat pembelajaran mengikuti setiap topik yang diajar oleh pensyarah.

Pertemuan bersema-muka pula diadakan di Pusat Sokongan Pelajarnya di 17 bandar utama seluruh negara, termasuk Sabah dan Sarawak. Pusat berkenaan terdapat di Alor Star, Pulau Pinang, Ipoh, Kuala Lumpur, Bangi, Seremban, Melaka, Johor Bahru, Kuantan, Kuala Terengganu, Kota Bharu, Kuching, Sibu, Miri, Kota Kinabalu, Sandakan dan Tawau.

Satu kelebihan universiti ini ialah, pelajarnya tidak perlu meninggalkan tempat bekerja atau tempat tinggal untuk mengikuti kuliah dan menghadiri pertemuan dengan tutor.

Unitem juga mengambil kira pengalaman kerja pemohon dalam memilih pelajarnya bagi mengikuti sesuatu program pengajian.

## Terbuka han ini

Justeru, universiti ini kini menjadi pilihan terbaik untuk mendapat pendidikan tinggi.

Universiti itu juga mempunyai Institut Pembangunan Profesional dan Pusat Program Pertahanan dan Keselamatan.

Oleh kerana Unitem ditubuhkan dan disokong padu oleh 11 universiti awam menerusi Multimedia Technology Enhancement Operations Sdn Bhd (Meteor), semua kurikulum pengajian digubal berdasarkan sukatan pengajian yang digunakan di 11 universiti awam berkenaan.

Universiti berkenaan ialah Universiti Malaya, Universiti Kebangsaan Malaysia, Universiti Sains Malaysia, Universiti Teknologi Malaysia, Universiti Putra Malaysia, Universiti Utara Malaysia, Universiti Pendidikan Sultan Idris, Universiti Islam Antarabangsa, Universiti

Teknologi Mara, Universiti Malaysia Sabar dan Universiti Malaysia Sarawak.

Kurikulum itu dikemas kini dan ditambah dengan penerapan kemahiran terkini terutama dalam aspek IT, kefasihan berbahasa Inggeris, pembangunan keusahawanan dan etika profesional.

Pelajar program diploma dan ijazah Unitem mempunyai pelbagai pilihan untuk membiayai pengajian mereka.

Selain membayar secara ansuran mengikut semester atau bulanan, pelajar universiti itu layak memohon untuk mengeluarkan caruman dalam Akaun Dua, Kumpulan Wang Simpanan Pekerja (KWSP).

Mereka juga layak memohon pinjaman pendidikan daripada Perbadanan Tabung Pendidikan Tinggi Nasional (PTPTN).

Perbadanan itu menyediakan

pinjaman RM20,800 untuk program ijazah pertama dan RM17,000 untuk pelajar diploma Unitem. Di samping itu, mereka juga boleh memohon pinjaman daripada yayasan negeri dan bank tempatan.

Maklumat lanjut mengenai Unitem boleh didapati dengan mengunjungi laman web di URL <http://unitem.edu.my> atau emel kepada [enquires@unitem.intranets.com](mailto:enquires@unitem.intranets.com) atau [marketing@unitem.intranets.com](mailto:marketing@unitem.intranets.com).

Unitem juga bekerjasama dengan Bahagian Pendidikan Guru, Kementerian Pendidikan dalam Program Penguatkuasaan Guru. Program itu terbuka kepada guru lepasan sijil dan diploma yang dijalankan secara PJJ. Guru yang melanjutkan pengajian di Unitem mendapat gaji penuh kerana mereka tidak perlu mengambil cuti daripada perkhidmatan.